

**TENDENCIA CIBERNETICO
PELIGROSO
TENE CUIDOU CU E-MAIL
DI PHISHING**



WWW.SOLODIPUEBLO.COM



SOLODIPUEBLO@GMAIL.COM



**Otmar Oduber lider di fraccion PPA:
“HASTA STAATSSECRETARIS
NO TA COMPRONDE
DICON GOBIERNO NO POR
TA TRANSPARENTE CU
PARLAMENTO RIBA RIJKSWET”**

**PODER DI DIALOGO Y CU DEBATE
TACTICO EVELYN WEVER-CROES A
LOGRA ANULA E PROME
"RIJKSWET" RIBA MESA**



**AUXILIO NV. ELMAR! PA
VARIOS DIA CABA CU
VARIOS CAMINDA PALONAN
DI LUS NO TA CENDI**



**HUMA DI CANDELA DI
SUSHI TABATA MOLESTIA
TURISTANAN NA EAGLE BEACH**



Otmar Oduber lider di fraccion PPA:

“HASTA STAATSSECRETARIS NO TA COMPRONDE DICON GOBIERNO NO POR TA TRANSPARENTE CU PARLAMENTO RIBA RIJKSWET”



Diamars e lidernan di fraccion a reuni cu e di 4 Staatssecretaris di Hulanda su conseheronan y pa fraccion di PPA, Otmar Oduber a insisti cu loke ta importante tabata pa papia di Rijkswet y no tur e puntonan di agende cu e staatssecretaris tabatin y a bin cu ne dilanti. Lider di fraccion di PPA a indica cu el a keda un biaha mas sorprendi, cu e dos fraccionnan cu ta sostene gobierno, esta AVP y FUTURO, no a ni sikiera papia y tabata completamente adorando e Hulandesnan, lubidando cu nan rol no ta pa representa gobierno, sino pueblo.

Postura indiferente y silencio total di coalicion

Realidad ta cu Gobierno a bin Parlamento y duna informacion superficial riba Rijkswet, pues e detayenan y e partinan mas crucial y sensitivo di e Rijkswet mes, no a presenta na Parlamento. “Mi a sali y mi a bisa nan directo y mi ta lamenta, cu un biaha mas bo ta wak e postura di e fraccionnan manera AVP y FUTURO, unda nan no a haci ningun pregunta riba Rijkswet. Tabata manera cu nan no kier papia mes di esaki, paso pa nan ya caba esaki ta un ‘done deal’. Ta cuestion di djis sinta warda esaki yega Parlamento, pa nan vota ‘voor’.

Secretario di estado

sorprendi cu accion di gobierno

Oduber a subraya cu tabata impactante y tristo, cu ora e proio Secretario di Estado a indica cu con ta posibel cu Parlamento no ta haya informacion di Gobierno. “E rol di Parlamento ta, cu Gobierno di pais mester duna nan informacion y nos no ta hayando esey. Y ta completamente corecto, cu e como Staatssecretaris no por bin te di Hulanda pa bin duna nos informacion”, Otmar a indica. Mas cuestionabel tabata ora cu e secretario di estado a comparti e pensamiento, cu tempo e tambe tabata den e rol di representa su pueblo y tabata den Parlamento, e no por compronde dicon Gobierno no ta informa Parlamento.

Gobierno no ta respeta funcion di Parlamento

Otro cos cu a bin dilanti den e reunion aki ta, cu ta imposibel cu un gobierno ta ‘bypass’ Parlamento riba un aspecto asina importante y esaki e secretario di estado a bay di acuerdo tambe cu

ne. Normalmente den un caso asina, unda ta trata Rijkswet, esta ley, ta Parlamento mester duna indicacion na su Gobierno, specialmente si ta papia riba autonomia di Aruba. “Ta Parlamento ta duna ki direccion un Rijkswet mester bay, paso ta trata di un ley, cu no ta solamente den su pais mester ehecut’e, pero den Reino tambe, y Parlamento mester duna bo direccion cu bo mester bay. Mi no kier a saca paña sushi su dilanti, pero realidad ta, cu Parlamento nunca a haya oportunidad, en todo caso e Parlamento nobo aki, pa ventila su pensamiento cu Gobierno, paso cada biaha ta sconde p’e” Otmar a expresa.

Importancia di Reunion Publico

Fraccion di PPA, cu sosten di MEP, a pidi un reunion publico pa discuti e topico crucial di Rijkswet, 5 pa 6 luna pasa. Un reunion di e caracter aki ta muestra claramente, unda y kico cada fraccion ta para p’e, no manera un ‘bijeekoms’ of presentacion den

comision central, caminda bo no mester fiha un posicion. Pero Parlamento ta keda den limbo: ningun fecha, ningun claridad, y gobierno y e coalicion di parlamento cu ta sostene gobierno y no pueblo, ta sinta warda decision di october den Consejo di Reino. Mientras AVP y FUTURO ta keda mudo y hasta ta adora e Hulandesnan cu ta bay kita nos autonomia, autonomia cu tur partido den pasado a lucha p’e, sin importa color y danki na e lucha ey, awe nan ta fungi como parlamentario. Segun Otmar: “Awe fraccion AVP y FUTURO a muestra cu tur cos ta manera ‘koek en ei’ cu e Hulandesnan sinta na mesa y ni sikiera nan kier a touch e topico di Rijkswet, pa por ventila e pensamiento cu ta biba cerca nos.” Finalmente Parlamento y pueblo lo sigui sin informacion concreto, mientras e parlamentarionan di coalicion ta sostene gobierno y e Hulandesnan ta sinta na mesa pa dicidi riba nos futuro.

BABY DI UN AÑA CU DIALUNA A BAY HOSPITAL CU KEINTURA, AWE NA CAS A BOLBE HAYA KEINTURA Y LIPNAN BIÑA

Diaranson atardi a drenta informe di cu e baby cu dialuna a haya keintura halto y a bay hospital awe diaranson a bolbe haya keintura na cas y ambulans mester a bay buske pa hib’e hospital.



Segun parlamentario Hendrik Tevreden

E GRIP DI HULANDA TA UN PELIGER P'E PAISNAN DI CARIBE HULANDES

Den un entrevista cu Top FM 95.1, parlamentario di MEP, Hendrik Tevreden, a duna su opinion riba e "grip" di Hulanda riba paisnan den Caribe Hulandes, uzando e Status Aparte di Aruba como un ehempel di exito.

Segun Tevreden, e control di Hulanda riba paisnan manera Corsou y Sint Maarten a crea un situacion dificil y a stroba nan desaroyo, mientras cu autonomia a duna Aruba e oportunidad pa florece economicamente.

E Efecto di e Grip Hulandes

Tevreden a cuminsa su declaracion door di menciona con, desde 10-10-10, Hulanda a probecha di un situacion pa pone un control mas estricto riba Corsou y Sint Maarten. El a cita e situacion na Boneiro, cu a bira un municipio di Hulanda, como un "mal desicion" den bista di hopi Boneriano cu ta sinti cu nan a perde nan isla. E parlamentario a señala e dificultadnan cu Corsou ta enfrenta pa tuma decisionnan economico independiente, y situacion critico di Sint Maarten cu, a pesar di tin fondonan millonario, no por finalisa e reconstruccion di su

aeropuerto pa motibo di e burocracia y e "grip" di Hulanda. Tevreden a splica cu e falta di conocimiento di e sistema local y e intento di impone e sistema di Den Haag ta causa hopi problema y retraso.

Autonomia: E Clave pa e Exito di Aruba

Opuesto na e paisnan aki, Aruba tin un storia di exito desde cu el a ricibi su autonomia na 1986. Tevreden a contradeci e idea cu "autonomia no por come," bisando cu e crecimiento economico y turistico di Aruba, cu a bira e fundeshi di nos entrada, ta un regalo di

e Status Aparte. Segun e parlamentario, e lucha pa autonomia a percura pa Aruba por a para riba su mesun pia, specialmente ora Hulanda a pensa cu Aruba lo bin bek "na rudia" despues di 1996. Den e añanan despues di 1986, Aruba a tuma pasonan firme y fuerte, scogiendo pa desaroya su turismo y dirigi su mesun economia pa bira exitoso.

Tevreden a terminabisando cu e punto cu e historia di Aruba ta un prueba cu autonomia ta un bendicion. E mesun autonomia cu a wordo ricibi, a percura cu Aruba por a desaroya



un economia robusto, un Parlamento propio y su mesun presupuesto y por dicidi pa su mes e rumbo cu e pais ta tuma. Esey ta e diferencia entre un pais cu ta pidi "un bureau, banki di scol, borchí di scol, pen cu potlood" y un pais cu ta dirigi su mes cu exito.

MINISTER WEVER: CONEXION CU CELIA PA ISLANAN ABC TA UN PASO STRATEGICO PA FUTURO DIGITAL DI ARUBA

Oranjestad, 13 augustus 2025 – Aruba ta para na un punto crucial den e desaroyo di su infraestructura digital cu e conexion na e kabel submarino di internet Caribbean ELite Alliance (CELIA). “Despues cu Setar, cu sosten di gobierno di Aruba a negocia cu diferente insituto financiero y partners strategico den mundo di telecomunicacion pa instala un kabel submarino nobo, a firma e acuerdo entre e partners na november 2024, cu a resulta den un decision strategico y visionario,” segun minister Wever.

Recientemente, na juni 2025 SETAR a firma un acuerdo cu Aquatel pa extension di CELIA pa Corsou y diaranson ultimo ta firma e acuerdo cu Saba Statia Cable Systems B.V. (SSCS) pa extende e conexion di CELIA pa Boneiro.

Durante e ceremonia di firmamento, den presencia di minister Rene Herde y minister mr. Geoffrey Wever, director di SETAR ir. Roland Croes y director di SSCS Sr. Werner Haan, Secretario di Estado di Relacion di Reino y Digitalisacion, Sr. Eddie van Marum a expresa: “Na momento cu

Boneiro conecta riba CELIA, lo por conta riba internet rapido y pagabel, pero tambe, conexion confiabel, cu ta necesario pa desaroyo economico entre Aruba, Corsou y Boneiro.”

Segun Minister di Finansa, Asunto Economico y Sector Primario, mr. Geoffrey Wever, e ta un placer pa mira cu e kabel submarino aki lo percura pa conexion entre e islanan Hulandes den region di Caribe y cu SETAR, un compania estatal ta lidera e proyecto aki.

“Conexion ta un condicion basico pa un economia moderno. Pa e motibo aki tambe gobierno como e unico accionista di SETAR a sostene e proyecto, e instalacion di CELIA y tambe expansion pa Corsou y Boneiro,” Minister Wever a bisa.

E proyecto lo fortalece conexion internacional, eleva seguridad di conexion, y brinda un base solido pa crecimiento di sector digital, servicio di data y desaroyo di comercio online. E ‘spin-off effect’ lo yega te na turismo, educacion, salubridad y otros sectornan vital di nos economia.



Di acuerdo cu e Programa di Gobernacion AVP-FUTURO 2025-2028, unda cu un di e metanan cu tin prioridad pa e gabinete ta pa crea un infraestructura digital moderno, incluso e expansion di internet, y forma pa sigura estabilidad y integridad di internet, e kabel submarino CELIA ta di vital importancia. E proyecto pa eleva e conexion digital ta di suma importancia den e vision di gobierno pa lo cual ta trata e desaroyo di e sector di FINTECH cu lo yuda diversifica y desaroya economia di e pais.

Minister Geoffrey Wever ta gradici e team di profesionalnan di Setar N.V. cu ta traha continuamente pa garantiza e conexion di pais Aruba, pero tambe tur e partnernan strategico cu a haci esaki un realidad.

TENDENCIA CIBERNETICO PELIGROSO TENE CUIDOU CU E-MAIL DI PHISHING

MACUARIMA, ARUBA: Recientemente por tuma nota di un tendencia nobo circulando di E-mailnan falso manera “phishing e-mails” na Aruba. Cuerpo Policial Aruba (KPA) conhuntamente cu Veiligheidsdienst Aruba (VDA) kier a informa y alerta e pueblo di Aruba pa lo siguiente.

E e-mailnan aki ta aparenta cu e ta bin di un persona cu bo conoce, p.e. amigo, familiar of un colega. Mayoria biaha den e e-mail tin un link of un archivo(file), na unda e criminalnan ta purba gañabo cu servicionan popular p.e. Adobe, DocuSign of SharePoint. Esaki ta muestra cu e ta extra confiabel. E e-mailnan aki casi semper ta di origen urgente of ta pidibo pa tuma accion di biaha.

Tene bon cuenta cu si bo click riba e link of habri e archivo (file), e riesgo ta grandi cu bo ta duna e criminal e acceso na bo cuenta di e-mail. Asina e criminal drenta den bo e-mail, nan ta manda e mesun e-mail falso na tur bo contactonan. E consecuencia ta cu e e-mail falso aki ta keda plama di persona pa persona y

di e-mail pa e-mail.

Nos ta sugeri si bo a habri/click riba e link pa haci lo siguiente:

1. Cambia bo password (contraseña) mas liher cu ta posibel. Tanto di bo Outlook (Microsoft) como tambe pa bo Gmail.
2. Log out for di tur aparato (celular, laptop, i-pad etc) na unda bo ta uzando (ingellogged) bo e-mail. Cera e sesion cu ta activo.
3. Evita pa uza e version di web di Outlook mas tanto cu ta posibel den e dianan bo dilanti. De caso cu bo mester uza e version web, percura pa cera e bentana of browser asina cu bo caba di uz’e.
4. Si bo NO sa con pa haci esaki, acudi pa yudansa cerca un persona di bo confiansa. Esey por ta un miembro di amigo, familiar of un colega.
5. Acudi na un warda di polis y notifica nan di e e-mailnan falso/sospecho.

Pakiko esaki ta importante:

- Door di click riba e e-mail falso y peligroso aki, criminalnan por evadi bo seguridad extra

manera Microsoft Authenticator.

- E criminalnan por haya acceso na dato personal, informacion di negoshi y passwords. Mayoria bes nan ta bende e informacionnan aki y ta uzanan pa comete actonan ilicito.

- Bo seguridad tambe ta pa proteha esun di bo famia, amigo- y/of coleganan online.


- Preveni ta mas facil y economico cu drecha e daño despues di un atake cibernetico.

Dicon nos ta anuncia e alerta aki pa nos comunidad?

Ta mira un crecimiento considerabel di cuenta di e-mail comprometi na Aruba cu ta sigui plama rond. Door di sigui e pasonan menciona, bo no ta solamente proteha abo mes pero bo ta yuda evita cu e e-mailsnan di “phishing” sigui plama rond.

Paga bon tino di esaki. Autoridad local como Nacional di Pais Aruba tin atencion pa e caso aki y nos ta monitoreando e situacion aki. Semper double check prome cu click pa abo no sali victima di esaki!

DAMA DI 37 AÑA A WORDO MALTRATA PA SU CASA Y AWOR E TIN PROBLEMA PA HALA ROSEA



Diaranson anochi a drenta informe di un caso di maltrato na Noord y ta pidi un ambulans cu urgencia pasobra e dama tin problema pa hala rosea, mesora a dirigi tanto polis como ambulans na e warda na Noord.



Na yegada di e ambulans ya polis tabata na e sitio y a constata maltrato severo unda su casa a maltrate. Ambulans mesora a atende y a transporte pa hospital cu urgencia.



Hendrik Tevreden (MEP)

A PESAR DI E DEBE GIGANTESCO DI MIKE EMAN, GABINETE WEVER-CROES A LOGRA SURPLUS

Parlamentario di MEP, Hendrik Tevreden, a duna un bista den e situacion financiero difcil cu e gobierno di Gabinete Wever-Croes a hereda na 2017. El a resalta e debe astronomico cu Gabinete Eman II a laga atras y a elogia e esfuerso di Gabinete Wever-Croes pa repara e finanzas di pais Aruba, logrando un surplus prome cu e pandemia.

E gerencia pisa di Gabinete Eman II

Tevreden a splica cu na 2017, Gabinete Wever-Croes a hereda un debe di mas cu 2.2 biyon florin, cu tabata representa un "Bad GDP" di casi 90%. El a menciona cu te hasta

un rapport di Algemene Rekenkamer, conoci como "Rapport Bo Aruba", a puntra unda e placa aki a bay, ya cu no por a trace e gastonan. E debe aki tabata un carga enorme pa e pais, pero asina mes, Gabinete Wever-Croes a cuminsa traha pa drecha e situacion.

Un surplus prome cu Pandemia

Segun Tevreden, prome cu e pandemia di COVID-19 dal pais Aruba, Gabinete Wever-Croes a logra un surplus di 44 miyon florin den un tempo record. Esaki tabata un logro enorme, ya cu e tabata un indicacion cu e maneho di Gabinete Wever-Croes tabata exitoso. E esfuerso

aki a muestra cu Aruba tabata riba un bon caminda financiero, y e exito aki tabata un victoria grandi prome cu e pandemia a cambia tur cos.

EDesafio di e Pandemia y un Decision Difcil

Tevreden a sigui splica con e pandemia a dal Aruba duro, forzando un decision difcil pa cera aeropuerto y para turismo, cu ta e unico entrada di e pais. E decision aki, tuma pa Gabinete Wever-Croes, tabata un sacrificio grandi pa por salba bida y segura cu e sistema di salubridad por a maneha e situacion di COVID-19. E parlamentario a enfoca riba e curashi cu e gobierno a muestra pa tuma



un decision asina, lagando un surplus atras pa por atende cu e desafio grandi di e pandemia.

Tevreden a termina su discurso bisando cu e storia di e debe di Gabinete Eman II y e surplus di Gabinete Wever-Croes ta un muestra di e

diferencia den maneho. E ta subraya e curashi di e gobierno di Wever-Croes, no solamente pa drecha e finanzas di e pais, sino tambe pa tuma e decisionnan difcil pa proteha e pueblo durante e pandemia, demostrando un liderazgo fuerte den un momento critico.

HUMA DI CANDELA DI SUSHI TABATA MOLESTIA TURISTANAN NA EAGLE BEACH



Diaranson atardi a drenta informe di cu turistanan ta sinti molester di un candela di sushi pabao di e ex-Morgan Island na Eagle

Beach, mesora a dirigi un unida di bombero na e sitio. Na yegada di e bomberonan nan a ripara mesora e candela di sushi

y a combati esaki pa e no forma ni un peliger ni molester pa e turistanan.

Hendrik Tevreden (MEP)

PODER DI DIALOGO Y CU DEBATE TACTICO EVELYN WEVER-CROES A LOGRA ANULA E PROME "RIJKSWET" RIBA MESA

Den un reaccion fuerte, parlamentario di MEP, Hendrik Tevreden, a duna un bista profundo riba e relacion entre Aruba y Hulanda, y a elogia e habilidad tactico di ex-Prome Minister Evelyn Wever-Croes. Tevreden a resalta cu for di 2017, e weganan politico cu Den Haag a bira mas intenso, pero partido MEP, cu su historia y conocimiento profundo di e relacion cu Hulanda, a sa di maniobra exitosamente. Un di e logronan mas grandi, segun Tevreden, tabata e forma con ex-Prome Minister Wever-Croes a logra anula un "Rijkswet" cu tabata riba mesa, mustrando e poder di un dialogo y un debate tactico.

MEP y su Historia cu Hulanda

Tevreden a enfatisa cu MEP no a cuminsa e bataya cu Hulanda for di 2017, pero cu e partido tin e "bagage" y e experiencia di lidernan di pasado desde 1971. E tabata un di e unico partidonan cu a logra negocia exitosamente cu Hulanda, logrando beneficio pa pais Aruba. Esey a wordo demostra no solamente cu e logro di Status Aparte, pero tambe cu e decision pa kita e dia di independencia cu tabata wordo forsa riba Aruba. Segun e parlamentario, e herencia, e tactica, y e informacion di con pa conduci conversacionnan cu Hulanda ta den e DNA

di e partido. A pesar di e cambianan den politica di Den Haag, caminda Hulanda a cuminsa pone personanan den cierto posicionnan cu un pensamiento contrario na Aruba, e partido a sa con pa sigui maniobra.

E Poder di un Dialogo Tactico y e Victoria di Wever-Croes

E punto principal di Tevreden su discurso tabata e elogio pa ex-Prome Minister Evelyn Wever-Croes. El a referi na e "conversacionnan tactico" cu Wever-Croes a hiba cu Den Haag, cu a resulta den e anulacion di e prome "Rijkswet". Tevreden a bisa cu Hulanda mes a bay den noticia y a



confirma cu e "Rijkswet is van de baan," esta cu el a wordo kita for di mesa. E victoria aki ta un prueba mas di e forma con MEP ta hiba dialogo y debate na un nivel halto cu Den Haag, saliendo victorioso

pa beneficio di Aruba. E logro aki ta fortifica e posicion di Aruba como un pais autonomo cu tin e capacidad di defende su interesnan nacional na un nivel superior.

AUXILIO NV. ELMAR! PA VARIOS DIA CABA CU VARIOS CAMINDA PALONAN DI LUS NO TA CENDI



Pa algun dia caba cu nos di nos seguidornan cu ta ricibiendo reclamonan palonan di lus ta keda

sin cende y cada biaha diferente caminda. Tin hende den oranan di madrugada sea nan ta cu ta cana bay trabao of pa salud y otronan ta bay den auto e scuridad ta trece dificultad y inseguridad pa nan.

No solamente esey pero tambe pa automobilistanan. Ta varios caminda caba cu por mira cu NV.ELMAR no ta drecha su palonan di lus kima of kibra. Riba e fotonan por mira algun ehempel.



OTMAR ODUBER DI PPA TA CUESTIONA KICO E GOBIERNO AKI TA PARA P'E: PLACA OF PRINCIPIO: MATERIALISMO OF IDEALISMO?

Den e entrevista cu lider di fraccion di PPA, Otmar Oduber a indica, cu recientemente por a wak cu Minister di Economia y Finanzas a bolbe menciona cu e 'voortgangsrapportage' ta mustra cu nos economia ta bayendo hopi bon. Pero kico e bon cifanan aki por nifica? Di berdad kier tapa e riesgo di nos autonomia cu cifra bunita? Pa Parlamentario Oduber, esaki ta un muestra cla, cu realmente nos por atende nos finanzas, si nos ta disciplina.

Begrotingskamer ta necesario!

Pa Otmar Oduber, como lider di PPA, tabata importante p'e pone enfasis, cu aunke e porcentahe pa e normanan a casi dobla den loke tabata stipula den e acuerdo, e mensahe ta simpel: nos mester tin disciplina! PPA lo keda insisti pa bin cu e 'begrotingskamer', pero esaki mester ta bon ancla den nos constitucion, unda cu mester di dos tercera parti di mayoria pa haci cambio den e normanan. "Pero e decision aki, bo no por hinca den di Den Haag, den un consejo di Minister, caminda 11 minister lo vota contra of pro, sin conoce e realidad di Aruba, unda nos ta depende asina hopi di nos turismo y di mercado Mericano. Pero atrobe bo ta wak claramente, cu no tin niun interes di

e dos fraccionnan cu ta sostene gobierno, pa papia riba e tema aki", Otmar a expresa.

Parlamento Den Sombra di Den Haag

Gobierno ta bisa cu na final, comunidad di Aruba lo mira kico cada fraccion ta para p'e, ora e tema yega Parlamento. "Pero loke mi a mira awe atrobe, sinta cu e Hulandesnan na mesa, caminda e propio staatssecretaris a conta di su lucha pa haya bo oido na Den Haag, como representante di su pueblo na Groningen, mester ta un señal crucial pa Aruba. Imagina bo, un propio Hulandes na Groningen, no ta haya oido na Den Haag, corda nos cu ta 11 ora leu y den Caribe? Con nos ta bay verwacht cu na Den Haag nan ta bay scucha nos? Nos a pidie pa porfavor hiba e mensahe aki pa Gobierno di Aruba y pa Gobierno di Aruba ta mas transparente cu e pueblo aki tambe", Otmar a subraya. E discusion aki no ta trata solamente porcentahe di interes, ta trata nos dignidad y derecho di tuma decision den nos mes cas.

Principio no tin prijs

"No ta trata cu nos kier reduci interes di 6.9% pa 3.5%, djis pa haya placa. Ta un cuestion di dignidad, integridad y orguyo di loke nos tin y hasta nos ta den esaki den propio Himno, corda esey bon! P'esey nos por tin autodeterminacion,



unda nos por tuma e decisionnan aki na Aruba", Otmar a sigui elabora. Pues nos mes por maneha nos futuro, sin tin mester di tin un man extendi di otro gobierno. Ta bon pa recorda, cu e herencia di autodeterminacion aki, ta danki na un lucha, cu a cuminsa den e añanan 1940, unda finalmente a termina na 1985 y a permiti nos drenta 1986 cu nos Status Aparte, pero a consolida na 1995, ora cu a scrap nos independencia. "Mi ta spera cu niun hende lubida esaki durante e discusionnan di awor, djis pa via di placa. Tin un dicho grandi cu libertador Betico Croes a uza: 'Materialismo nunca por vence idealismo' y mi ta spera cu esunnan cu tabata carga e antorcha di idealismo aki, cu tambe a papia di; 'baas den mes cas', corda esaki awe na 2025," segun Otmar Oduber.

Pa conclui ta importante pa tur ciudadano cu ta stima y honra nos luchadornan di antes, cu e pregunta simpel, pero profundo: Aruba lo eligi placa of principio? Un pueblo cu a lucha pa su autonomia, no por entrega su bos y autodeterminacion den man di 11 minister den

Den Haag. E discusion aki mester ta duidelijk: no ta solamente cuanto placa nos por saca, sino ken ta manda riba nos destino. "Y esey, pueblo di Aruba, ta un decision cu mester tuma awe, no ora bira demasiado laat," Otmar a finalisa bisando.

Clasificados










SOLODIPUEBLO@GMAIL.COM

CEL.585 9500



Minister Geoffrey Wever:

CONCEPTO DI LEY PA MODERNISA PERMISO PA NEGOSHI TA CLA

Oranjestad, 15 di augustus 2025 – Minister Geoffrey Wever ta anuncia cu concepto di ley pa modernisa permiso di negoshi ta cla y entrega pa e trayecto huridico por start. Hunto cu cooperacion cu Hulanda via di e Landspakket, e cambio di ley pa permiso ta forma parti di un di instrumentonandimaneho economico pa optimalisa e proceso di permisonan. Via landspakket Hulanda a financia e trabao huridico pa traha e concepto ley pa modernisa permiso di negoshi.

Negoshinan chikito

y grandi ta forma e fundamento pa crecimiento y desaroyo economico di Aruba. Cu digitalizacion di tur peticionnan pa permiso pa negoshi y modernisacion y publicacion di “Beleidsrichtlijnen Vestiging van Bedrijven”, awor riba iniciativa di Minister Geoffrey Wever, e ley pa permiso “Vestigingsverordening” lo wordo adapta pa stimula mas comercio na Aruba.

Cambionan di ley ta entre otro (1) pa crea e base legal pa tur peticion wordo entrega digital, (2) haci e periode dentro di cual

un permiso di negoshi wordo duna mas cortico, (3) cu no mester aplica pa un directeursvergunning mas, (4) no lo tin e toets obligatorio na Camara di Comercio cu lo acelera e tempo dentro di cual un permiso di negoshi ta wordo duna, (5) lo introduci instrumentonan legal pa controla si negoshinan ta cumpli cu ley di permiso di negoshi y cu por duna boet si esaki no ta e caso y (6) tambe ta haci posibel pa introduci un moratorio riba negoshi of limita cierto negoshinan den barionan specifico.

E cambionan aki den e ley



di permiso pa negoshi lo baha e tempo e permiso di negoshi lo wordo otorga, ta elimina mas “red tape” posibel y lo mehora e clima di inversion pa asina tin mas comercio na beneficio di Aruba su economia y

desaroyo. Ta premira pa e ley nobo pa permiso di negoshi drenta na vigor na comienzo di 2026 segun minister di Finansa, Asunto Economico Sector Primario Geoffrey Wever.

ARUBA TA FELICITA BOLIVIA CU NAN DIA NACIONAL



Den Haag – Directora di Gabinete di Aruba Joselin Croes LL.M/M.Sc a atende un recepcion na ocasion di Dia Nacional di Bolivia. Señora Croes a felicita embahador Roberto Calzadilla Sarmiento cu e celebracion di nan dia nacional.

Republica di Bolivia ta celebra e aña aki 200 aña di independencia.


Durante di e recepcion Joselin Croes a haci uso di e oportunidad pa papia cu embahador di otro paisnan y asina fortaleza su network den e mundo



diplomatico na Den Haag. Nota pa redaccion: E

potretnan ta cortesia di Gabinete di Aruba

MIEL DE ABEHA



Ayeratardi den un sala yen, Genesis Gil Barrios a presenta su prome publicacion 'Miel de abeha'. Un experiencia cu e poeta mes ta describi como "Un experiencia hopi

bunita". Genesis a conta publico presente un poco di su desaroyo como poeta y e proyecto di publica un coleccion di poema y tambe busca un titulo pa su coleccion di poema. Esaki ta un seleccion di poema skirbi durante hopi aña, durante diferente fase di e poeta su bida. E ta describi nan como poema di amor. Amor den diferente forma y pa diferente hende den su bida. Inspiracion ta bini for di diferente emocion, for di diferente experiencia diariamente. Genesis semper ta capta su experiencia di bida y emocionnan den palabra

y despues ta elabora y sigui forma den su estilo poetico.

E bunita artwork pa e publicacion aki ta di Carla Garcia.

Genesis a entrega 5 ehemplar di 'Miel de abeha' na Biblioteca Nacional Aruba.

'Giraluna', number di cariño di Genesis, ta un poeta hoben di Aruba y Giraluna ta biba actualmente na Hulanda. Giraluna ta docente di Ingles. Giraluna ta describi su coleccion di poema como "a collection of love written in Papiamentu,



for anyone who knows that sometimes love is language."

Pa haya un idea of sabor di su poemanan por bishita e website di Giraluna

Lansamento Miel di Abeha | Giraluna Gil
Find Giraluna on Instagram

SECRETARIO DI ESTADO EDDIE VAN MARUM TA OTORGA UN BESCHIKKING NA PROME MINISTER MIKE EMAN PA PROYECTONAN

Durante su recien bishita na Aruba, Secretario di Estado Eddie van Marum a entrega un beschikking oficial na Prome Minister Mike Eman, marcando un paso importante den colaboracion entre Aruba y Hulanda pa trata cu sinceridad nos historia comparti, incluyendo e periodo doloroso di esclavitud.

Segun Prome Minister Eman, e proceso cu Aruba y Hulanda a pasa ultimamente ta un motibo di satisfaccion y animo, mirando cu esaki a permiti ambos pais papia cu curason habri y reflecciona riba un pasado cu den hopi momento a dividi nos. A logra haya otro den un proceso di pensa riba e pasado locual ta yuda

determina nos direccion pa futuro, basa riba e pasado comparti y momentonan dificil, pero cu consciencia cu tur hende ta humano y ningun hende ta sin pica. E beschikking ta inclui un compromiso pa yuda cierto proyecto na Aruba, entre otro:

- Re-imprimi un buki balioso riba historia di esclavitud na Aruba.
- Creacion di un estatua conmemorativo.
- Organisa evento pa aumenta conscientisacion riba e tema di esclavitud.
- Financia un localidad nobo pa Archivo Nacional di Aruba.

Prome Minister Eman a subraya cu Archivo Nacional tin un papel crucial den investigacion y

reflexion riba nos pasado di esclavitud. Tin un conexion directo entre un archivo nacional profesional y completo y e conocimiento di pasado cu mester sigui investiga. Ta fundamental pa por uza e informacion obteni pa defini e futuro.

Durante e reunion, Prome Minister Eman a duna Secretario di Estado van Marum un presentacion di e plan pa renoba e tankinan di awa di Kibaima, cu lo bira e centro pa warda e archivonan nacional y tambe un museo dedica na historia di esclavitud. Eman a gradici van Marum pa e beschikking cu, segun e, lo yuda cu un meta hopi balioso pa Aruba.

Secretario di Estado Van Marum a duna di conoce cu no por cambia



e historia, pero por siña di dje si. Mester wak pa dilanti y tene e partinan scur di pasado, leu for di futuro.

Roald Lapperre, Director - General Koninkrijksrelaties, a agrega cu den e proceso, mester a siña scucha otro, pasobra e perspectivanan tabata hopi biaha diferente riba e historia comparti. Sr. Lapperre a keda hopi

impresiona cu e manera cu Archivo Nacional di Aruba a lidera den region, y cu lo yuda otro isla pa haci nan archivonan mas accesibel door di digitalisacion y uzo di software special cu por interpreta manuscritonan di antes. Esaki lo duna oportunidad pa pueblo studia su mes historia di un manera hopi mas profundo.

ACCIDENTE PA FALTA DI PREFERENCIA NA CRUSADA PELIGROSO NA PIEDRA PLAT



Diamarsanochiadrenta informe di un accidente unda ambulans a topa


cun'e na un crusada peligroso na Piedra Plat, mesora nan a

para baha wak pero no tabata tin hende herida y nan a yama polis pa avisa nan di e accidente aki, mesora nan a dirigi un patruya na e sitio. Na yegada di e patruya

a bin compronde cu e Hyundai Accent blauw no a duna preferencia na e Hyundai Accent cora y nan a dal den otro. Afortunadamente ningun hende a resulta

herida pero como e autonan a keda meymey di caminda y tabata na un crusada peligroso polis a dirigi e trafico na e sitio.

VUELO CU A KEDA CANCELA DI DIAMARS MAINTA PA BOGOTA Y ECUADOR A LOGRA SALI AWEMADRUGA



Diamars mainta un vuelo di Avianca pa Bogota y Ecuador a keda cancela debi na fayo di motor pa un piesa daña. E piesa entre tanto a yega diamars

atardi pero como 3 niaha e vuelo a keda extendi. E pasaheronan cu a keda afecta pa e tardansa aki a ser aloca na e hotel cerca di airport y un otro 60

pasahero a ser hiba un otro hotel. Finalmente den oranan casi mainta a logra keda drecha y esaki por a sali cu rumbo pa Bogota y Ecuador.

Paga bo cuenta online ta facil

Sea Abonnement of Aviso

Pago online, facil y lihe

Pa hasi pago online pone number y adres na cuenta di banco RBC Sunmax Printing account # 7700000100152447

STAATSSECRETARIS IMPRECIONA DI SU BISHITA NA SANTA ROSA



Departamento di Agricultura, Cria y Pesca Santa Rosa tabata tin e honor y placer di ricibi bishita di Staatssecretaris di Hulanda sr. Eddie van Marum hunto cu su delegacion. Riba e mainta aki nan a wordo ricibi pa director di Santa Rosa sra. Nathalie Maduro y tambe presente minister di Sector Primario sr. Geoffrey Wever. Despues di un introduccion chikito caminda henter e delegacion a ricibi un bunita pechi di Santa Rosa como regalo y asina duna inicio na e recorrido den Santa Rosa pa

admira seccion y cultivonan cu e departamento mes ta produci. E recorrido tabata canando y asina haya un splicacion cortito di kico ta tareanan responsabilidad, proyecto y manehonan di Santa Rosa riba e tereno di Sector Primario. A admira matanan di fruta y berdura cu tin planta y tambe haya un splicacion di e tipo di Bacanan cu nos tin y nan rasa. Asina e recorrido na pia a continua caminda a yega na e seccion caminda tin planea e Agri Innovation Park (AIP) lo mester bin. A tuma un momento di

descanso y asina sr. van Marum haya un presentacion cortito di minister sr. Geoffrey Wever y sr. Erwin Greoneveld di kico lo bai bira e proyecto enkeustion. Tur presenta na e ocasion aki a ricibi algo pa refresca cu ta un tremendo juice di lamunchi prepara y tambe un drigidek como pasaboca. E recorrido a continua despues pa e DC ALFA Food Forrest caminda tambe a haya un splicacion encorto di kico tabata e idea y pa ilustra otro sistema sostenibel cu nos ta studiando pa local ta su contribucion commercial. Pa culmina e paseo den Santa Rosa a yega na "Cunuco Chabelito" cu ta nos "Kinderboerderij" caminda varios di nos productornan local tabata anfitrión. Aki e Staatssecretaris sr. Eddie van Marum a bishita cada un di nos productornan local invita pa asina serca conoci cu nan y admira kico ta e



productonan cu nan ta produci y ofrece na e pueblo di Aruba. Asina a haya un splicacion cortico di cada productor presente. Por a admira sra. Rachelle Peterson kende ta produci varios tipo di Mushroom. sr. Jair Britten di "Cunuco Calbas" kende ta un productor di carni fresco, Brandon Maduro y Angelique Croeze di "Croeze Farm" cu su variedad di berdura. Sra. Shirley Illidge cu ta produci varios liquer, esnan di Pestana Ranch cu nan produccion di Webo Fresco, sr. Jake Arends di "Cunuco Fresh" cu ta produci lechuga fresco, sr. Daniel Barros kende ta un apicultor y ta produci honing y otro productonan, sr. Charles Koolman kende ta un productor di pinda masha popular y na

final tabata sr. Ivan Dijkhof di "Sunny Greens" cu ta produci varios Micro Greens. Culminando sr. van Marum su bishita a dirigi palabra na tur presente di ta masha contento y impreciona di kico tur ta wordo produci na Aruba den un clima no facil y ta masha contento di por a admira tur esakinan hunto na un ocasion asina special. Di parti di Departamento di Agricultura, Cria y Pesca Santa Rosa nos ta gradici primeramente VNO Aruba pa por a hasi tur posibel pa Staatssecretarifs sr. Eddie van Marum bishita nos departamento. Na minister di Sector Primario sr. Geoffrey Wever y tur productor local cu por tabata presente pa hasi e dia uno formidabel pa nos bishitantenan.

Clasificados

SOLODIPUEBLO@GMAIL.COM
CEL. 585 9500

CLASSIFIEDS

SOLO Di Pueblo

ATLETANAN DI IQFOIL TA CONTA UN POCO DI NAN PREPARACION PA ASU2025



Ayera durante dia (Windsurf Olimpico) a Fuera di pasa e parti di atletanan Kaj y Zara cuminsa nan proceso di registra tur nan ekipo di Rozeboom di iQFoil preparacion pa ASU2025. competencia, por a mira e



situacion di e escenario di competencia y combersa cu e otro paisnan presente.

Kaj y Zara ta comparti un poco di kico tur

nan a experiencia e ultimo dianan aki na Encarnacion-Paraguay y ta duna di conoce di ta cla pa e competencia! #TEAMARU

DIASABRA AWO TIN E GRAN CLASICO ENTRE TEAM SNOR Y PARIBA LEGENDS!



Calabas/Kudawecha - Diasabra awo, 16 di augustus, cuminsando pa 8'or di anochi, e mundialmente famoso Domino Square Garden, situa net n'e grens entre Calabas y Kudawecha, tin e gran honor di presenta otro edicion dje gran clasico entre e teamnan durisimo di TEAM SNOR y nan eterno rivalnan di "boven de brug", PARIBA

LEGENDS! Si, shonnan amante di domino cu forsa categoria 5, esaki ta e di cuatro edicion dje gran rivalidad cu ta existi desde aña 2022 entre e dos ekiponan aki cu conoce otro door en door. Pa haya un bista con bon e ekiponan aki ta "ingespeeld" riba otro, lo ta bon pa nos duik un rato den historia y observa resultadonan anterior. Na

nan prome encuentro, esta na 2022, Pariba Legends a sorpresa un y tur door di pika bay dilanti na halftime cu score di 11 - 7! Sinembargo, trabuconan bakia di Team Snor a coy curpa bek y a sa di gana e encuentro cu score di 21 - 19. Team Snor pues ta bay 1 - 0 dilanti den e Clasico. Na di dos encuentro, esta na 2023, Pariba Legends a manera studia e buki "Lessons Learned", y a bin bek duro duro. Na halftime, Pariba Legends tabata tin bentaha di 11 - 9, y despues den un wega sumamente preta no a laga esaki bay mas y a gana cu score di 21 - 20! Un sambombaso di wega, caminda Pariba Legends ta empata e clasico na



1 - 1! Na aña 2024, Team Snor a bin miho prepara; ya den halftime tabata bisto cu Pariba Legends a bin tiki moli ora cu Team Snor ta ganando cu score di 11 - 6, y e impresion aki no a cambia na final ora cu Team Snor a bay cu e victoria cu anotacion di 21 - 18. Team Snor pues ta pika bay dilanti den e clasico cu score di 2 - 1.

Pues awor, apreciable fanaticada di domino, diasabra binidero lo bay dicidi si Team Snor lo amplia e score pa 3 -1, of Pariba Legends lo pasa mashin di feita den e bigoti

y tabla cuenta na 2 - 2! Manera semper, entrada lo ta gratis pa publico en general, y durante halftime, e pasapalanan lo ta totalmente por nada! Bini un bini tur, bin celebra no solamente otro edicion di e gran Clasico entre Team Snor y Pariba Legends, pero alabes tambe bin festeha e cumpleaños di lider di Team Snor himself, e conocido Nelson "Snor" Perez. Tur esaki, diasabra awor, 16 di augustus, cuminsando pa 8'or di anochi n'e mundialmente famoso Domino Square Garden! Yegaaa!

ESNAN CU A DIVORCIA Y TA BIBANDO CU OTRO PERSONA DEN ADULTERIO Y NAN TA KERE CU NAN TA SALBA

Bo no sa, cu unabes cu bo ta casa pa Dios den e Sacramento di Matrimonio, bo ta keda casa pa Dios te na morto y Dios no ta reconoce divorcio. Awor, si bo ta un hende divorcia y bo ta biba cu otro, anto ta con bo por yama bo companjante bo esposo of bo senjora maske cu boso ta casa pa raad? Bo no tabata sa cu bo ta bibando den e pika condenabel di adulterio? Bo sa cu e pika di adulterio ta condenabel pa Dios y na tur esnan cu a muri den nan pikanan di adulterio, nan lo no drenta den e Reino di Dios y nan destino lo ta den fierno of den purgatorio. Bo mester compronde cu e di 6 Mandamento di Dios Tata ta bisa bon cla: “Lo bo no comete e pika di adulterio.” Lesa den Bijbel Mateo 5: 32, na unda Senjor Hesus ta adverti bon cla: “Ami ta bisa boso: Ken cu divorcia di su senjora, si no ta pa motibo di infidelidad, e ta pone su senjora comete adulterio. Es cu casa cu e senjora divorcia, e tambe ta comete adulterio.” Akinan nos por compronde bon, si un homber divorcia di su senjora, anto e ta provoca cu e senjora ta bay busca un otro persona pa biba cun'e den e pika di adulterio. Akinan e homber cu a divorcia di su senjora, ta keda responsabel di su senjora cu el a divorcia. Y tambe e homber ta keda responsabel di su senjora cu ta bay perdi den e pika di adulterio. Na e dia di huicio dilanti di e tribunal di Dios Tata, e homber y e muher tin di duna cuenta di nan actonan di divorcio y di adulterio. Lesa den Bijbel Marko 10: 6-9 : “Na principio di creacion, Dios a traha homber y muher, p'esey e homber lo laga su tata y su mama pa e uni cu su muher y nan dos lo bira un solo curpa. Di manera cu nan no ta dos mas, sino un solo curpa. Pues loke cu Dios a uni, no ta permiti pa hende separa.” Esaki ta e Sacramento di Matrimonio di Dios den Misa, na unda cu Dios ta uni e pareha den un solo curpa, pa medio di un sacerdote y cu dos testigo. Tambe bo por compronde, cu Dios no ta reconoce divorcio y e pareha mester keda uni te na morto, maske cu nan a divorcia pa raad. Dia cu bo a casa den e Sacramento di Matrimonio den Misa pa Dios, bo no a huramenta pa Dios dilanti di altar, cu bo lo keda fiel den bon tempo y den tempo di adversidad, den tempo di abundancia y den tempo di pobreza, den tempo di

salud y den tempo di enfermedad, den tempo di pas y den tempo di pleito y di stima otro manera bo mes y di keda fiel te na morto? Awor mi ta puntra bo, ta na unda bo huramentonan a keda dilanti Dios? Laga nos lesa den Bijbel Mateo 5: 33, na unda cu Senjor Hesus ta bisa tocante huramento : “Tambe boso a tende loke a ser bisa na boso antepasadonan: Lo bo no kibra huramento y lo bo cumpli loke cu bo a huramenta na Senjor.” Akinan, bo no a huramenta dilanti di Dios den Misa, di keda hunto y fiel cu bo pareha te na morto? Den Bijbel Huan 4: 5-42, akinan nos por lesa, ora cu e muher Samaritana a pidi Hesus p'e haya e awa di bida eterna, p'e no haya sed di awa nunca mas, anto Hesus a bise, bay busca bo esposo y bin cun'e cerca Mi. E muher Samaritana a bisa Hesus, mi no tin esposo, anto Hesus a bise'le, bo tabata tin 5 homber y e homber cu bo ta bibando cun'e awor, no ta bo esposo. Akinan nos por compronde cu e muher Samaritana ta bibando den e pika grandi di adulterio, pasobra ela divorcia di su prome casa, pa despues ela bay biba cu diferente homber den e pika di adulterio. Akinan tambe, Senjor Hesus ta bisa na tur esnan cu a divorcia y ta bibando den e pika di adulterio, pa nan bay busca nan senjora of nan esposo cu Dios a uni nan den e Sacramento di Matrimonio, pa e pareha cu a divorcia por ta salba di e condenacion den fierno. Bo no tabata sa, si bo muri den bo pika di adulterio, bo no por drenta den e Reino di Dios. Lesa den Bijbel 1 Corinthionan 6: 9 y 10: “Boso no sabi, cu e inhustonan lo no drenta den e Reino di Dios? No ganja boso mes, pasobra ni e fornicadornan, ni e adoradornan di diosnan falso, ni esnan den adulterio, ni e homosexualnan, ni e ladronnan, ni e burachenan, ni e blasfemadornan, ni esnan golos pa plaka, ni e abusadornan, nan tur lo no drenta den e Reino di Dios.” Tambe den Bijbel Testament Bieuw Levitico 20: 10, na unda cu Dios Tata ta bisa: “Si un homber ta comete adulterio cu un muher casa di su prohimo, nan dos lo muri, e adultero y e muher adultera.” P'esey cambia boso bida prome cu ta laat, pa boso no ser condena den e candela di fierno despues di morto.



Publica serka nos anuncio di fayecimento di bo ser keri.
Nos tin 2 pakete pa ofrese;


Pakete 1: Anuncio di fayecimento te dia cu e defunto ser dera
Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto ser dera
Gradicimento y invitashon pa misa pa 3 dia
Na Canal 22 1x prome cu Noticiero 22 Afi 400,00

Pa mas informashon por tuma contacto cu oficina na
585-9500 of na 741-4554

GRADICIMENTO Y INVITACION
Nos ta gradici famia y amigonan cu a sostene nos den e momentonan mas dificil na ora di morto inespera di nos ser keri.

Victor Manuel Giel
Mihor conoci como “Toy”



Danki na tur hende cu a manda message, yama of pasa na cas e ultimo dlanan. Tambe na esnan cu tabata presente na e despedida.

Alaves nos ta invita pa un misa na misa di Sta Anna, Diasabra 16-08-2025 pa 7.00 or di anochi.

Despues di ultimo misa lo tin un rosario na cas.

Don't think of him as gone away- his journey's just begun, life holds so many facets-this earth is only one . . . Just think of him as resting from the sorrows and the tears in a place of warmth and comfort, where there are no days and years.

Think how he must be wishing that we could know today how nothing but our sadness can really pass away.

And think of him as living in the hearts of those he touched. . . for nothing loved is ever lost-and he was loved so much.

NA SERO PELA UN PERSONA A CAY FOR DI STELLAGE Y TA SANGRANDO PA OREA



Diahuebs mainta a drenta informe di cu un persona lo a cay for di un stellage na Sero Pela y ta sangrando pa orea, mesora a dirigi un ambulans na e sitio. Na yegada di e ambulans di e victima no ta mucho bon. Nan a atende y a transporte pa hospital.

NA SAN MIGUEL TRAHADORNAN TRAHANDO CU CANDELA RIBA E DAK Y HUMA TA SALI DEN PLAFOND

Diaranson atardi a drenta informe di cu trahadornan trahando cu candela riba dak mientras paden huma ta sali for di plafond na un cas na San Miguel, mesora a dirigi un unidad di bombero na e sitio.

Na yegada di bombero a constata cu esnan trahando riba e dak a pone mucho candela y e plywood a cuminsa kima paden na e plafond.

Mesora bomberonan a paga e candela y a daño a keda minimal,



SUDOKU

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		7	1				5	
				7	4	8		
	2		3	8			7	6
				4	8		1	9
		8				5		
6	9		5	3				
8	7			1	9		3	
		3	8	5				
	1				3	9		

BOMBERONAN A BAY PA INFORME DI CANDELA NA E EDIFICIO BANDONA BANDA DI C.M.B. DEN CAYA!



Diaranson mainta a drenta informe di un candela na e edificio banda di C.M.B. den caya, mesora a dirigi bomberonan na e sitio. Na yegada na Middenweg a bin resulta un casita unda

un adicto ambulante ta drumi y e colchon meymey di tur e sushedad cu ta na candela. Bomberonan a los un slang y a basha awa riba e candela anto paga esaki.

Gradicimento/Invitacion

Famia ta gradici den nomber di su casa Jacky y yiu nan Gregory y Rigo, nieta, Amelia, ruman nan y demas famia tur amistad, amigo nan, y conocir nan cu di un of otro manera a contribui y a duna sosten durante enfermedad, fayecimento y despedida di nos defunto stima



Gregorio Ramiro Creeze

Un danki na pastor Jairo Maduro, Sra. Lola Geerman di Wilhelmina KankerFonds, Dr. Franca, Dr. Waterloo, Dr. Vis, Dr. Nuboer, oncologo nan y tur enfermero nan di Horacio Oduber Hospital, especialmente di piso A4.

Un danki special na su trahadornan di Urataka Center y tambe na tur esnan cu a hasi donacion na Wilhelmina Kankerfonds, pa tur e bishita nan, mesahe nan, Facebook messages, Whatsapp messages, carchi nan di condolencia, areglonan di krans, na Aurora Funeral Home, especialmente na Judith y staff pa e bon servicio y atencion cu nos a recibi.

Alabes nos kier a invita famia y conocir nan pa 1 Santo Sacrificio di Misa pa descansa di alma pa nos defunto stima cu lo tuma lugar na Misa Inmaculata Concepcion Santa Cruz

Diasabra 16 di Augustus 2025 pa 7:00 PM

Famia ta gradici di curazon



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - August 14, 2025

 Sorteo # 8621 9070 1440 7808  X2  Sorteo # 7665 0076  X2  Sorteo # 2370 7918  Sorteo # 6424 1147 Acuario  Sorteo # 1354 262  X2	 Sorteo # 2618 0x Jackpot 0x Match 4+ 6x Match 4 149x Afl. 12,00 05-11-16-20-34 Joker 27 Letter L Proximo Jackpot 400.000,-	 Sorteo # 6916 0x Jackpot 5x Match 4 104x Afl. 8,00 06-15-21-26-28 Proximo Jackpot 52.000,-	 Sorteo # 0x Jackpot 0x match 4 0x Afl. 500,00 0x Afl. 50,00 0x Afl. 15,00 Mega Ball Proximo Jackpot 450.000,-  Afl. 675.000,-	 Sorteo # 
--	---	---	--	--

FORTALEZA PA FAMIA

Scirbi pa Pastor Marcel Balootje.

BO FAMIA TIN MUCHO MAS BALOR, CU PLACA Y MATERIALISMO

Tur hende mester di placa, tur hende kier yega na tur cos, pero ora bo amor pa placa aumenta asina tanto cu bo no tin tempo pa Dios, bo cas, y bo famia, ta un senjal di advertencia hopi peligroso, y cu ta desmostra cu amor pa placa ta domina bo bida.

Amor pa placa ta pone hende traha dos trabao, tres trabao, pasobra e competencia, ta hinca den bo cabes cu locual cu bo tin no ta suficiente, y bo kier mas di e parti financiero, y e parti humano, e responsabilidad pa famia ta cay atras drasticamente.

Laga boso karakter ta liber di amor pa placa, y sea contento cu loke boso tin, Pasobra E mes a bisa: Nunca lo Mi bandona bo y nunca lo Mi laga bo desampara. (Hebreonan 13:5).

No ta desconoci pa ningun hende cuanto hende ta laga nan yuinan nan so den cas, pa nan bay traha e di dos trabao pasobra e placa no ta yega pa e bida cu nan kier biba. Nan ta bisa nan ta duna nan yuinan tur cos, pero e tempo pa duna amor disciplina y coreccion ta cay cortico dia tras dia.

E mucha ta mas ocupa den su tablet y otro weganan digital, y no lubida riba e television, pa e no nota ausencia di su mayornan den cas. E mucha su mente ta ocupa den wega, y distraicion, y no tin comunión cu su mayornan.

Asina e mucha den e tempo cu mas e mester di



presencia di su mayornan, ta crece su so, pasobra e necesidad di placa, a separa amor di mayor, for di e calor pa e yiu.

Ta hende mes mester pone un balans den e asunto aki, y tuma un rato y samina bo bida, y haci un pregunta kico tin mas balor, mi famia of corre tras di placa, posicion, competencia di trabao y materialismo?

Kico tin mas balor, mi matrimonio, mi famia, mi yuinan mi cuenta na banco of mi Potmonni?

No montona tesoro pa boso mes riba tera, caminda mot y frusto ta destrui nan, y caminda ladron ta kibra drenta y horta, Ma montona tesoro pa boso mes den cielo, caminda ni mot ni frusto no ta destrui nan, y caminda ladron no ta kibra drenta ni horta, pasobra caminda boso tesoro ta, eynan boso curason lo ta tambe. (Mateo 6:19-21).

No cu mi ta papia pasobra mi tin necesidad, pasobra mi a sinja di ta contento, den mi circunstancia cu

sircunstancia mi a sinja e secreto di ta barica yen y di pasa hamber, tanto di tin abundancia, como di pasa necesidad. Tur cos mi por den Cristo, Kende ta duna mi fortaleza. (Filipensenan 4:11-13).

Tene cuenta cu hende no

Nos mester educa nos yuinan cu nan curpa, mester wordo respeta y cu den ningun circunstancia nan no por bende nan mes pa placa.

Sinja nan para riba nan curpa, y respeta nan mes, pa asina nan sinja conoce e amor berdadero di hende pa hende, pasobra awendia ta facil pa hende duna bo cos, haciendo manera nan ta hende bon y hende decente, caba bo ta wordo cumpra sin bo sa.

Ta un gran berdad locual e palabra di Dios ta bisa cu nos ta bibando den temponan trabahoso.

Hende a bira stimado di placer mas cu Dios.

No lubida cu placa no por reemplasa amor y presencia di Dios.

Oracion di dia

Un feliz dia bendiciona yena cu gracia di Dios

"Lo Bo ta sacerdote pa semper na e mesun manera cu Melkisedec." (Hebreunan 7, 17b)

Ruman aki nos ta mira Hesus cu e titulo Sacerdote/Rey di Husticia pa semper, bunita titulo pa Hesus aunke Hesus no mester di ningun introduccion of titulo paso E ta Dios y Dios ta Amor. Asina mes den Hesus nos por experencia Amor, E Amor Unico cu nos tur ta anhela consciente y inconscientemente nos tur ta anhela di experencia E Amor di Dios.

Ta dificil pa esey sosode? Ta bon pa nos sa cu tur cos ta depende di con habri nos curason ta pa Hesus y con nos ta permiti Spirito Santo move den nos.

Diadomingo nos a scucha cu nos tin e donnan y awor ta keda nos nada mas cu resa y pidi Spirito Santo habri nos curason pa nos experencia y pone e donnan den practica y asina acepta y cumpli cu Dios su boluntad den nos bida y nos biba!

Oracion: Hesus mare nos tur por reconoce cu Abo ta nos Rey di Husticia y acerca Bo curason misericordioso pa nos salvacion.

Amen